

Premio Letterario Nazionale Ignazio Russo 2013

Giuseppe Cardella

Di sciàvuru m'arricriu

poesie

*autore vincitore del
Premio Letterario Nazionale
"Ignazio Russo"
2013*

AULINO  EDITORE



collana
Premio Letterario Nazionale
“Ignazio Russo”
2013

in copertina:
Pittura tridimensionale dell'autore
Giuseppe Cardella in arte "clla"
1997 - Mondo Onirico n° 4 - cm 40x50x10
manipolazione tela + acrilico

Giuseppe Cardella

Di sciavuru m'arricriu

poesie

poeta vincitore del
Premio Letterario Nazionale
“Ignazio Russo”
2013

AULINO  EDITORE

© 2015 GIANMARCO AULINO EDITORE S.R.L.

Sciacca (AG) – via degli Olmi, 14 – tel. 0925.85056

e-mail: info@aulinoeditore.it – www.aulinoeditore.it

Riproduzione vietata anche parziale.

Tutti i diritti riservati.

ISBN 978-88-86911-51-1

Arsu di siti

Arsu di siti sugnu di tia,
vagnami 'sti labbra cu li tò,
dissita l'anima dintra di mia,
dammi a vùviri l'amuri tò.

Ti sentu e pi mia si 'n'alimentu
la to vuci mi trasi 'nta li vini,
un focu s'adduma nun mumentu,
ccà ti vulissi, cu mia e stari vicini.
'Sta fiamma ca cuva è viva e ardenti,
nun saggiu comu fari pi carmalla,
tu si luntana e nun po fari nenti,
iu stessu mi dugnu aiutu 'p'astutalla.
'Nveci di la me, vulissi la to manu,
pi carmari 'stu focu, ca s'accanisci,
la fiamma s'astuta pianu-pianu,
si sfoga e di piaceri s'arricchisci.
Un milioni di scintilli vibranti,
sparsi 'nta 'stu focu ardenti,
astutaru 'sta fiamma accicanti
accussì cuitaru, corpu e menti.
Ora sugnu sazziu di siti e d'amuri,
ma, 'sta fiamma l'astutassi tutti l'uri.

Chi ti nni pari ?

Sartu nascivu,
pò divintavu pitturi,
scola 'n'appi picca
ma scrivu tutti l'uri.
La puesia
nasci pì sintimentu,
iu scrivu cu amuri
e sugnu cuntentu.
Nun sugnu un pueta
e mancu n'allitratu,
si sbagliu a scriviri
speru di essiri pirdunatu.
Si 'stà scrittura
nun nné di tò gradimentu,
nun sparlari
nun ricavi giuvamentu.
Si vò propriu criticari ...
pensacci prima di giudicari.
Scriviri versi e falli rimari
nun 'né di tutti...Chi ti nni pari ?.

Du còccia di grànnuli

Dintra un càlici
di vitru russo,
du còccia di grànnuli
spartùti l'uno di l'atru
aspèttanu d'addivintàri
'na sula ùnica gùccia.

Gùccia ca dissita
l'arsùra, la smània,
l'ardiri, l'amùri.

Gùccia d'amùri
spartuta di tanti gùcci,
aspetta 'nsilènziau
la forza di 'n'onda
pi purtalla
all'atra sponda.

Ùnica e sula, è china d'amùri,
pari nica,
ma è cchiù granni di lu mari.

‘Na farfalla di sita russa

Cu tecchia di stoffa
di sita russa, piegata ‘ndù,
cu l’ali chiusi, tagliavu ‘na farfalla.
La pusavu ‘ni un sciuri
di gelsuminu,
cu l’ali aperti vulava vicinu-vicinu.

‘Ni l’ali, ci scrissi
lu to nomu,
ci misi puru amicizia
gioia e tantu amuri.
‘Sta farfalla mi pari vera
fa sciavuru di primavera.

La stringiu nnì li mani,
pi nun falla scappari,
haiu paura ca si pirdissi
e nun ti putissi diri
‘ntrappulata nnì quarchi scogliu,
l’amuri ca ti vogliu.

La misi mezzu un libru di poesii,

è lu giustu postu unni putiri stari.
Ogni tantu lu grapu e la taliu,
mi pari ca la sintissi parlari
dicennumi
ca vulissi vulari.

Comu capita ti la fazzu vidiri.
Si ti la pigli, è signu d'amuri,
si la lassi è signu d'amicizia.
Nenti cangia di comu decidi,
tu, resti sempri nnì lu me cori
fa comu vò, l'amuri nun mori

Chista è la menti di n'artista
abbunnatu di tanta fantasia,
scrissi 'sti versi, pinsannu a tia.

Panuzzu

Panuzzu
muzzicatu di tanti denti,
nun ti lamenti, nun dici ma nenti.
Panuzzu
cottu si beddu duratu,
quantu tribù, popoli ha sfamatu !

Panuzzu
si cchù duci quannu si scuttatu
sazzii d'amuri a cu t'ha manciatu.
Panuzzu
di lu furmento si ricavatu,
si donu di lu Signuri criatu.

Panuzzu
si Santu 'ni lu Sacramentu,
l'Ostia 'nì duni d'un calici d'argentu.
Panuzzu
si lu corpo di Gesù,
cu avi fidi a tia, nun mori cchiù.

Di sciàvuru m'arricriu

Caminannu a l'appèdi strati-strati
sentu lu vuciàri e lu sparlittù.
Lu fannu assittati fora l'anziani
'mmucca a iddi mancu a li cani.

Pàrlanu di chissu e di chiddu,
di 'ncrasciati, di corna,
di fuitini e di la crisi
ca nun s'arriva a fini misi.

Caminannu pi la via
la testa ti svarià,
senti lu sciàvuru di cucinatu
e resti allammicatu.

Senti sciàvuru di pisci fritti,
di sazizza arrustuta 'nta lu focu,
di pasta a fornu ggià sfurnata,
di patati fritti e di carni 'mpanata.

Acchianannu, senti sciàvuru
di milinciani fritti, di sardi arrustuti,

di pasta cu l'agliu e l'ogliu,
di carni arrustuta cu lu 'nzogliu.

Lu cchiù ardu su e diliziusu
è chiddu di lu baccalà
anchi fattu cu tecchia di limiuni
cu lu sulu sciàvuru ti senti un liuni.

Unni ti trovi-trovi
è un forti richiamu
lu senti denzu e precisu
nni lu nasu ti resta 'ncisu.

Chistu è lu sciàvuru
di la fimmina, di carni
frisca e 'mprufumata,
pronta a èssiri assapurata.

Lu nasu avi l'uduratu supraffinu,
la fimmina la senti puru di luntanu.
Parica la tucassi, quasi avarù,
sentu lu so sciàvuru e m'arricriu.

La pinzioni

Vulissi lu misi cchiù curtu
pi prima pigliari la pinzioni;
a la posta succedi quarchi furtu
pi li latri su mali tentazioni.

Pensu d'accattari tanti cosi:
lu frigurifiru pi lu vinu friscu,
lu rigalu pi li niputeddi sposi,
lu sicarru pì mè ziu Franciscu.

Appena li pigliu mi mettu a cuntari,
prestu finisciu, su dù sordi 'mmani.
Chissi si mettinu sparti pi mangiari,
lu restu nun bastanu mancu pi dumani.

Carta e penna prestu p'assummari,
luci, metanu, acqua e munnizza,
scadinu tutti 'stu misi di pagari.
nenti mì ristà, mancu pi nà pizza.

Atru chi frigurifiru, rigali,
sicarri, e viniceddu,

li promessi eru tutti a mali,
lu statu mì spinnà comu n'aceddu.

Fussi giustu daricci 'nà lezioni:
videmu si riniscissiru a campari,
arrigalamucci la nostra pinzioni
nun ci bastassiru mancu pì mangiari.

Perciò, pinziunati, stringemu li denti
a iddi di natri nun cì 'nteressa nenti.

L'omu

'N'omu
mi dissi:
pirchè tu si filici
jochi e canti
e iu no?
Pirchè?... Pirchè!
Tu si omu e iu no!
Iu haju l'ali e tu no!
Iu volu e tu no!
Iu sugnu libiru e tu no!
Pì mia nun ci sù
nè chianuri,
nè muntagni,
nè mari, ne celi,
unni piaci a mia vaju.
Tu 'nveci,
prima di cataminariti
a chiediri
"PIRMISSU".
Unni a ghiri,
chi a fari,
comu t'a vestiri

e comu a mangiari.
Lu capisti ca si nuddu
ammiscatu cu nenti!
E di la bedda vita
nun ‘nà caputu nenti!
Talia a mia,
talìa comu volu.
Volu a mari,
‘ncelu, a lu sciumi,
‘ncapu ‘na rosa.
Pi forza a essiri
filici e contenti!
Nò comu a tia!
omu di...
Bum!.....Bum!.....Bum!...
Ti spararu!
T’ammazzaru!
Arraggiuni aviatu:
nenti c’è di pigliari.
Accussì semu!
Senza pietà.
Èratu filici e contenti
l’omu la vita ti livà.

Lu mè paisi

Prestu mi susu ogni matina,
grapu porta e parmisciana
beddu suli trasi e aria fina,
vinticeddu di tramuntana.

Magazzolu, Platani e Verdura.
‘Mmezzu ‘stì sciumi c’è Ribera,
è terra ca lu viddanu adura
è lu vantù di la natura vera.

Di la Viradura a la Pirrera,
di li Musiti a Siccagranni
sciurisci lu paisi di Ribera
cu aranci e frutti tutti l’anni.

Li sciavuri eccellenti
si la fannu tutti a gara,
sempri idda è la vincenti
è la nostra bianca zagara.

Di Rivela l’aranciu è lu vantù,
pari lu suli ‘mezzu li viridi fogli

è un piaceri pì cù l'ha mangiatu.
è friscu, duci appena chi si cogli.

Chi diri di li fimmini rivilisi:
tutti beddi fini e 'ntelligenti,
di famiglia bona, su burgisi,
laureati e tutti indipendenti.

Di 'stu paisi allegru e fistanti,
tanti cosi ci fussiru di diri
li biddizzi di Rivela sunnu tanti.
si nun ci criditi viniti a vidiri.

Cari furasteri, allura vi dicu:
firmativi a Rivela e respirati,
l'aria fa beni puru a lu nutricu,
è miraculosa e cura li malati.

Lu scrusciu di 'na vasata

Lu sapiti chi scrusciu fa 'na vasata?

Fa lu scrusciu di milli ciancianeddi,
di milli coccia d'acqua caduti di 'ncelu,
di centu cannati chini di diamanti,
di centu viulina e di milli cantanti.

'Sti vasati fannu 'stu scrusciu
quannu si d'nanu cu disideriu,
cu passioni, cu amuri, cu affettu,
tràsinu 'nta lu cori, 'nta lu pettu.

Cchiù forti è lu scrusciu
cchiù duci è la vasata
e lu sapuri resta
pi tutta la jurnata.

Cc'è la vasatedda,
la vasata e la vasatuna,
la megliu è chidda
quannu cu amuri si duna.

'Na vasata data di matina
fa tantu scrusciu
ca s'addiviglia
puru la vicina.

Cu 'na vasata data sutta li cuperti
senti la musica di milli cuncerti.
Cu 'na vasata data cu tutti li sentimenti
senti tutti li campani di lu cuntinenti.

Si nun ci criditi
faciti la prova,
'na vasata cu lu scrusciu
la vita vi rinnova.

Lu veru pueta

Quantu poesii cci vonnu
pi divintari pueta?
Comu unu scrivi 'na poesia,
a menti sò, già è pueta.
A mia nun mi pari giustu
appropriàrisi di tantu sapiri.
Nta ogni paisi, mìnimu,
cci su 'na cinquantina di pueti,
ognunu si senti megliu di l'atru.
Po cci su chiddi ca si sèntinu
supiriuri a Danti. Ma dicu iu,
'n'hànnu sali 'ntesta 'sti pirsuni?
Iu haiu scrittu tanti e tanti poesii,
haiu ricivutu un saccu di premi,
ma pueta nun mi cci sentu
e mancu cci sugnu.
La poesia è 'na vera virtù,
cu scrivi l'havi nta lu cori,
ogni versu, unu appressu a l'atru,
veni dittatu di lu funnu dill'anima.
Nni la poesia, sa va sèntiri
lu cori battiri forti,

la musica nni li palori,
l'emozzioni nni l'occhi,
lu trimulìu nni li mani,
la scossa nni lu corpu.
Eccu cu è lu veru pueta!
Lu veru pueta è chiddu ca nun scrivi
tantu pi fari 'na poesia, ma scrivi
pi dari un missaggiu di beni
e di fratillanza a la genti.
'Nsignàri a un picciliddu
ca va a la scola, l'amuri pi l'atru,
pi la paci, pi la fidi, pi lu Signuri.
Pi mia, pi èssiri veru pueta,
si cci a va nàsciri, a va èssiri
donu di la natura, donu di Diu.
Sulu iddu è lu veru, unicu pueta.

Lu viniceddu

Acchianannu 'ntà nà cullinedda
e si vidi lu celu cu lu mari vasàri,
chista è la nostra Sicilia bedda
ca sulu natri sapemu amari.

Li viti chiantati diritti a filagli,
lu viddanu li zappulia cu amuri
a la vinnigna restanu li guadagni
e si scordanu fatichi e suduri.

Lu suli forti cannaria d'estati,
coci li grappuli ca penninu durati,
li cocchia su beddi niuri e vellutati
fannu vèniri la 'mmidia a tutti li stati.

Sutta n'arbulu d'aulivi lu curtivaturi
cu nà fedda di pani e tecchia di cumpànaggiu
mangia e ringrazia lu nostru Sarvaturi
pi daricci saluti, forza e tantu curaggiu.

Quannu li macchinarii mancavanu,
fimmini, masculi, amici e parenti

scazi dintra un tinu mentri abballavanu
la racina scrapisavanu cuntenti.

Di lu ‘ccippettu sculava lu viniceddu
chiaru, gustusu, simplici e frizzanti
si lu pò viviri puru un ‘nuccinteddu
ma si ssi esagira fa cadiri un giganti.

Cu fù, cu li spirtizzi, ca ‘mbriacà a Pulifemu
passannucci sutta la panza e lu dinocchiu?
Fù Ulissi cu li compagni ca lu pigliaru pi scemu.
Pi lu vinu, lu giganti cci appizzà l’unicu occhiu.

Lu superchiu rumpi lu cuperchiu,
‘ni tutti li cosi ci voli l’autucuntrollu,
cchiù attentu s’ava stari quannu è vecchiu,
parti pi la testa e si perdi lu cuntrollu.

Lu vinu duna forza a li malati,
cura la menti e li mali radicati
perciò un bicchiireddu di vinu a lu jornu
leva malincunii, malatii e medici di tornu.

L'arbulu di mennula

Quantu è beddu l'arbulu di
mennula sciurutu 'mprimavera.
E' comu 'na fimmina 'namurata
a quarant'anni disidirusa di dari
e riciviri tantu amuri.
L'arbulu, chinu di sciuri bianchi,
pari comu 'na sposa davanti
all'artari maggiori c'aspetta
lu zitu pi si maritari.
D'invernu, pari n'arbulu siccu,
senza spiranza di fari fruttu.
Po 'nveci, ni la primavera
s'addiviglia e linchi cu li so sciuri
li terri di biancu. E' 'na meraviglia
di la natura, pari comu si ci fussiru 'nterra
tanti cuperti di pizzu bianchi ricamati a manu.
Pi natri agrigentini 'stu sciuri è
troppu 'mpurtanti, tantu ca ci
facemu ogni annu 'na gran festa.
E' la cchiù bella festa di la primavera,
unni lu sciuri si grapi spontaniamenti,
comu d'amuri si grapi lu nostru

cori pi vuliri beni a tutta la genti.
Chista è la festa di lu
“Mandorlo in fiore”.
Li vii d’Agrigentu, ‘ni stu periudu
su chini-chini di genti vinuti di tutti
li parti di lu munnu.
Tra balli, canzuni, cummedii
e folclori si la fannu tutti a gara.
Cu vinci, cu perdi, pocu ‘mporta, picchè
l’aria fina, l’amicizia, l’amuri,
di la bedda Sicilia ognunu si porta.
Lu Signuri allarga li vrazza
e abbrazza li sciuri pi nun faricci iri
lu ventu chi veni di livanti e di punenti,
lu viddamu lu ringrazia e resta contenti.
Eccu ca spuntà un cucciteddu di mennula,
pari comu la manuzza di un picciliddu ca
teni lu senu di la mamma ca l’allatta.
Passa tempu e di lu sciuri nascì lu fruttu.
Passa ancora tempu e dè già natra prima-
vera, arrè tempu d’amuri.
Tutti l’arbuli su tutti chini di sciuri
è la natura chi crià lu nostru Signuri.

‘Na foglia gialla

‘Na foglia gialla cadì
di un ramu di granatu
adasciu si posa ‘nterra
senza nuddu ca l’ha tucatu.

lu ventu la isa di ‘nterra
lenta, la fa vulari,
la porta ‘nn’all’aria
‘ncerca d’unni pusari.

Accussì vulissi essiri,
vulissi essiri cumu a tia,
vulari di ccà e di ddà
vulari comu pi maggìa.

Mi issi a pusari
‘nta cori scunsulati,
tristi e malincuniati,
ca nun hanno statu amati.

Eccu, chi vulissi fari.
Nnì ‘sti cori duri

purtaricci caluri,
gioia, amuri.

Vola, vola, vola,
nun ti firmari,
cerca finu ca trovi,
va finu a 'mmari.

Nun c'è bisognu
ca voli tantu gatu
posati 'ni lu me cori,
iddu, voli essiri amatu.

.

Zuccaru filatu

Pi la fera, un firaru,
arridennu mi dissi:
l'assaggiassi è
zuccaru filatu,
nun lu paga è rigalatu.
Mi parsi malu
e l'accittavu.
Mi lu misi un pocu mucca,
è 'na veru spicialità,
ammumentu squaglià.
Nintra; misu 'nta na sdraia,
cu l'occhi chiusi,
mi parsi di truarimi 'ncapu
ddu zuccaru filatu ca vulava,
nun sapennu unni mi purtava.
Cu lu suli ca cannariava,
mi purtà 'nta 'na stidda,
nnì la stidda di mezzìu.
Nuddu la vidi, ma c'è,
nun si fa taliari di cu dagghè.
C'era un lustru ca
piciavanu l'occhi.

Arrivavu giustu ‘ntempu di manciari.
C’era ‘na tavulata ca nun finiva mà,
iddi, già eranu iunti a mità.
‘Ncapu dda tavula
c’era ogni grazia,
c’era lu beni di Diu.
Cu manciava di ccà
e cu viviva di ddà.
Comu trasivu, mi ficiru ‘na festa,
pi primu San Petru; subitu mi dissi:
cu ‘stu mazzuni di chiavi
comu veni arrè, po iri unni vò,
piccamora nun ‘ne tempu tò.
Assèttati e mancia cu natri.
Eranu tutti canuscenti,
tutti amici e parenti.
Cu mi salutava di ccà
e cu mi chiamava di ddà.
C’era lu dutturi, lu scarparu,
lu parrinu cu tutti li fedeli,
l’avvucatu, lu varberi,
lu sartu, lu ‘nfirmieri,
l’onorevoli e lu ‘ngigneri.

Chiddu di lu giru mi dissi:
vidi comu si campa ccà ?
Ccà nun c'è, ne droga, 'ne guerra,
c'è paci, nun c'è unu chi si sciarria,
nun c'è odiu, e nuddu si 'mmidia.
La cosa cchiù bella lu sa qual è ?
Ccà, nun ci su sordi,
nun s'accatta nenti,
chiddu chi voli unu si piglia,
semu tutti 'na famiglia.
Subitu ci rispunnivu!
A ccà 'mparadisù semu!
San Petru, mi dissi: bravu,
ora sì ca lu capisti, facisti
tanta strata e nun ti pirdisti.
Saluta a tutti pirchè ti nnà gh'iri,
nun nnè ura pi tu stari ccà.
Comudu piccomera 'ni la sdraia
un gridu a l'aricchi mi fici satari,
dicennumi, vattinni a travagliari.
A menti me pinsavu:
ma pirchè m'addivigliavu!

Finito di stampare nel maggio 2015
per conto di Gianmarco AulinoEditore S.R.L. - Sciacca

In queste liriche c'è tutto un mondo, tutto il cuore di un poeta, i suoi sogni, le speranze, le illusioni, i momenti di passione e di disperazione; alcune poesie su argomenti di piccante umanità sono espresse con molto garbo e delicatezza. Cardella è un uomo semplice, profondamente legato ai valori tradizionali: ama la famiglia, la sua terra, la natura rigogliosa, i suoi figli ed anche per lui ha profondamente valore la religione, il desiderio di pace e concordia, l'amicizia e, perché no? anche l'amore.

ISBN 978-88-86911-51-1



9 788886 911511